

Kōrero

Pānui

Tuhituhi

Pāngarau

Tau 3

Kua waihangatia Ngā Whanaketanga Rumaki Māori kia mōhio ai tātou kei whea tō tamaiti i roto i ngā mahi ako i Te Reo Matatini me te Pāngarau.

E hāngai pū ana ngā whanaketanga ki te Marautanga o Aotearoa, ko te whakaako i ngā wāhanga ako katoa, arā – Te Reo Māori, te Pāngarau, te Pūtaiao, ngā Tikanga ā-Iwi, te Hauora, Ngā Toi, Te Reo Ingarahi me te Hangarau.

Me mātua whakarato te kura o tō tamaiti i ētahi pūrongo ā-tuhi e rua i te iti rawa ki a koe i ia tau. Mā aua pūrongo koe e whakamōhio e rere pēhea ana tō tamaiti i runga anō i Ngā Whanaketanga me te Marautanga. Mā te kura hoki tana kōpaki mahi e homai, heoi ki te kore, tonoa te kaiako kia whakaatu mai i ētahi tauira o ana mahi.

Mō te pukaiti nei, kua kapohia ngā momo akoranga a tō tamaiti i tana tau tuatoru i te kura – ā-kōrero, ā-panui, ā-tuhituhi, ā-pāngarau anō hoki. He kaponga noa iho ēnei e kite ai koe e pēhea ana ōna mōhioanga, ōna āheinga hoki i roto i ēnei wāhanga ako.

Mēnā kua uru atu tō tamaiti i nā vtata ake ki roto i te mātauranga rumaki ki te reo Māori, tērā pea ka paku rerekē te āhua e aromatawaihia ai – hei whakaata i tōna roa i roto i te mātauranga rumaki. Kōrero ki tō kaiako mēnā he āwangawanga ōu – māna e whakamārama ki a koe kei te pēhea te haere o āna mahi ako.





Kōrero

I te tau tuatoru i te kura, ko te reo kōrero o tō tamaiti kei te tīmatanga o te taumata 2 o te marautanga.

E whakawhanake ana tō tamaiti i tana māramatanga ki ngā kaupapa kōrero, tae noa atu ki ngā horopaki ōkawa, pērā i te pōwhiri ki ngā ākongā hou.

E ako ana tō tamaiti ki te:

- whakawhanake i tana āheinga ki te kōrero i runga i te ngākau māia e pā ana ki ngā wheako o ia rā, o ia rā
- kuhu atu i ētahi taipitopito kōrero ki ana kōrero, tae atu ki ana whakawhiti kōrero
- tautohu i ngā ariā matua i ngā kōrero e rongō ana ia
- whakamahi i ngā kupu maha ake
- raupapa i ana whakaaro.



He tauira o ngā mahi kōrero, mahi whakarongo

- Mahi takirua – mā tō tamaiti tana hoa e uiui e pā ana ki ngā āhuatanga e pai ana, me ērā kāore e pai ana ki a ia. Kātahi ia ka kōrero ki te akomanga mō tana hoa.
- Ka ako me pēhea te kawē i tētahi mahi hou i te rorohiko (hei tauira, te hanga tūtohi), ka whakamārama atu ai ki tana hoa.

I te kāinga

- Ka kōrero tahi kōrua mō te tunu i tētahi kai, pēnei i te parehe pea – “He aha ngā kīnaki pai ki a koe?”, “He tōmato, he tihi, he ōriwa, he aha atu?”
- Āwhinatia ia ki te rangahau i ngā kōrero o mua, ngā kōrero pea a tētahi o ōna kaumātua ake – “I pēhea i a koe e tamariki ana, e Koro?”, “E hia te utu o te aihikirimi i taua wā?”
- Me kōrero tahi kōrua e pā ana ki tana tino kiripuaki i tētahi pukapuka, kiriata rānei – “Ko tēhea te kiripuaki pai rawa ki a koe i roto i tō tino kiriata?”, “Kōrero mai he aha ai?”

Pānui

I te tau tuatoru i te kura, ko te reo pānui o tō tamaiti kei te tīmatanga o te taumata 2 o te marautanga. E pānui ana ia i ngā pukapuka o te Kete Kiekie me te Kete Pīngao.

E pānui ana, e whakawhiti kōrero ana tō tamaiti e pā ana ki ngā tuhinga pohewa, tuhinga pono hoki, me te tautohu anō i ngā ariā matua mai i ngā mea kua pānuitia. Kua waia ia ki ētahi o ngā ariā me te hanganga o ngā rerenga e pānuitia ana, heoi he hou hoki ētahi.

E ako ana tō tamaiti ki te:

- tautohu me te matapaki i te pūtake i tuhia ai te kōrero – hei taki pea i tētahi mahi, hei whakamārama, hei whakaahua rānei
- tautohu i te raupapatanga mahi i tētahi tuhinga
- tautohu i ngā kupu ingoa, ngā kupu mahi, ngā kupu āhua
- tautohu i ētahi kupu, kiānga rānei e tūhono whakaaro ana – nō reira, heoi anō
- kite i te pānga o ngā kāwarawaratanga ki te āhua o te whakapuaki, ki te tikanga, ki te rere hoki o te pānui.

Kua wehewehe ngā pukapuka ki roto 'Kete'. Tīmata ana ki te Kete Harakeke – he māmā, he poto te tuhinga. Ka piki ake ki te Kete Kiekie, ka piki anō ki te Kete Pīngao, ā, ki te Kete Miro rā anō. Kei ia pikinga ka uaua ake, ka matatini ake te tuhinga. Hei tana tau tuawhā i te kura ko te tikanga e pānui ana tō tamaiti i ngā pukapuka o te Kete Pīngao.



Ko ētahi āhuatanga o te pukapuka Pīngao i tēnei reanga

- He huhua ngā whakawhiti kōrero a ngā kiripuaki.
- He roroa ētahi o ngā rerenga.
- He maha ake ngā momo kāwarawaratanga.
- He huhua ake ngā kupu whakaihiihi.
- E waia ana te tamaiti ki ngā kaupapa me ngā horopaki.
- Ko te raupapa o ngā mahi, e haere kōtui ana me te taka o te wā.

I tō tamaiti e pānui ana, tērā pea ka:

- kōrero ia mō te mutunga o te paki – he aha ngā āhuatanga ka pā
- whakamahi ia i te horopaki kia māmara ai ia ki ngā kupu hou
- kōrero ia mō ngā pikitia me te whakahāngai ki ōna ake wheako whaiaro.

I te kāinga

- Pānui ki tō tamaiti i ia rā, i ia rā.
- Whakaritea kia maha ngā momo mea hei pānui māna i te kāinga – he pukapuka nō te whare pukapuka, he moheni, he pukapuka tohutaka, he niupepa hoki.
- Āwhinatia tō tamaiti ki te rapu i ngā kupu hou i ngā momo papakupu ā-tā, ā-ipurangi hoki – He Pātaka Kupu, tā Ngata, Tirohia Kimihia.

Tuhituhi

I te tau tuatoru i te kura, ko te reo tuhituhi o tō tamaiti kei te tīmatanga o te taumata 2 o te marautanga.

E taea ana e tō tamaiti te tuhi kia nui tonu ngā taipitopito kōrero, me te tūhono haere i ngā ariā maha. E whakawhanake ana ia i tana āheinga ki te whakatika i ana tuhinga – hei tauira, te kite i ngā hapa me te whakamahi i ngā rautaki kua ākona ki te whakatika atu.

E ako ana tō tamaiti ki te:

- whakarite i ana tuhituhi kia ū ki tētahi hanganga māmā e tika ana – he tīmatatanga tō te tuhinga, he tuhinga waenga, he mutunga anō
- āhua o ngā kārawarawatanga maha, nā runga i te kaha ake o tana whakamahi i ēnei hanga i roto i ana tuhinga
- tātaki tika i ngā kupu, me te tātaki i ngā kupu hou mā te tūhono i te pū ki tōna oro
- tuhituhi mō ngā pūtake maha mai i ngā wāhanga ako pērā i ngā Tikanga ā-Iwi, te Pūtaiao me te Hauora.



I tēnei tuhinga a te tamaiti nei, kua:

- hoatu e ia he upoko hei āwhina ki te whakawhāiti, ki te whakaemi i ōna whakaaro – ‘He Momo Kākahu’
- tātaki tika ia i te nuinga o ngā kupu
- whakamahi i ngā kupu e hāngai ana ki te kaupapa – huruhuru, tāniko
- whai whakaaro ki te taha tā, inā rā, kua hoatu he taitapa whakapaipai.

I te kāinga

- Whakatītinahia tō tamaiti ki te tuhi whakaari – tuhia ngā kōrero a ngā kiripuaki, hangaia he tikiti, tuhia he hōtaka, mahia ngā kākahu whakaari, ngā whakapaipai atamira, tonoa hoki te whānau kia haere mai ki te mātakitaki.
- Tiakina ngā kōpaki reta, ngā pepa whare pūtea, ngā pepa uiui hoki kia pai ai te whakawai a tō tamaiti ki te tuhi pērā i te ‘pakeke’.
- Me tuhi ia i ngā imēra, ngā pātuhi, ngā kāri hoki ki ana hoa, ki te whānau.
- Whakanikonikohia ngā tuhinga poto mā te tapahi, te whakapiri āhua me te whakarākei.
- Hangaia āna ake kāri pōhiri rā whānau.
- Whakatītinahia tō tamaiti ki te tuhi rārangi māna anō – ‘Aku hiahia mō ngā hararei’, ‘Aku moemoeā’, ‘Ngā taputapu mō te kura’.

$$\begin{array}{l}
 2 \times 1 = 2 \\
 2 \times 2 = 4 \\
 2 \times 3 = 6 \\
 2 \times 4 = 8 \\
 2 \times 5 = 10 \\
 2 \times 6 = 12 \\
 2 \times 7 = 14 \\
 2 \times 8 = 16 \\
 2 \times 9 = 18 \\
 2 \times 10 = 20
 \end{array}$$

$$\begin{array}{l}
 5 \times 1 = 5 \\
 5 \times 2 = 10 \\
 5 \times 3 = 15 \\
 5 \times 4 = 20 \\
 5 \times 5 = 25 \\
 5 \times 6 = 30 \\
 5 \times 7 = 35 \\
 5 \times 8 = 40 \\
 5 \times 9 = 45 \\
 5 \times 10 = 50
 \end{array}$$



Pāngarau

I te tau tuatoru i te kura, ko te mahi pāngarau a tō tamaiti kei te tīmatanga o te taumata 2 o te marautanga. He 60–80 ōrau o ngā mahi pāngarau, he aro ki te ako tau.

Ka whakaoti rapanga tūturu ia me te whakamahi i ōna māramatanga ki te tau, te taurangi, te āhuahanga, te ine me te tauanga. Ka whakaoti rapanga mā te whakawehe tau me te neke haere i aua tau (engari kāore e taturia) – $8+5$ ka $8+2+3$.

E ako ana tō tamaiti ki te:

- tūhura i ngā tau tae noa atu ki te 1,000
- whakamahi meka matua ki te whakaoti rapanga
- kōrero mō ngā hautau, pērā i te $\frac{1}{2}$ me te $\frac{1}{4}$, i a ia e torotoro ana i ngā āhua me ngā rahinga
- whakanahanaha i ētahi hanga me te kōrero i ngā āhuatanga e rerekē ana, e ōrite ana
- waihanga me te whakaatu i ngā tauria
- ine mea, ine wā hoki
- tuku me te whai tohutohu
- rangahau kaupapa, me te whakaatu, te matapakī anō i ngā kitenga.

He tauira rapanga pāngarau

18 ngā makimaki i te whare kararehe. Ka riro mai kia 4 anō ngā makimaki.

E hia ngā makimaki ināianei?

I te kāinga



He hira, he pārekareka hoki te pāngarau i roto i ngā mahi o ia rā. He rerekē pea te whakaoti rapanga mai i te wā i a koe i te kura. Mā tō tamaiti koe e ako ki ngā huarahi o nāianei.

Ngā tau me ngā tauira

- Akiakihia tō tamaiti ki te whakaoti rapanga ā-hinengaro mō te tāpiri/tango tae atu ki te 20 – $10+4$, $15-7$.
- Me āwhina atu ia ki te tāwhai i tētahi tauira tāruarua, pērā i te kōwhaiwhai.

Ngā mahi o ia rā

- Kōrerohia te wā – “karaka”, “haurua mai”, “hauwhā ki”.
- Ākona ngā papataua whakarea mō te 2, te 5 me te 10.
- Kimihia ngā āhua me ngā tau i roto pukapuka, whakairo, pikitia rānei.



Ngā mihi ki a rātou mā kua tautoko i te kaupapa nei.
Ngā mihi hoki ki te ākonga, nāna te tuhinga i te wāhanga
Tuhituhi o tēnei pukaiti.

He kōrero anō mō Ngā Whanaketanga Rumaki Māori
me Te Marautanga o Aotearoa kei te pae tukutuku o
Te Tāhuhu o te Mātauranga, www.minedu.govt.nz.

Kaitā pikitia: Ellie May Logan.

Kaihoahoa: Spencer Levine.

Ko te pukapuka i te wāhanga Pānui, ko *Tōku Koroua
Hīanga* nā Vanessa Cooper i tuhi.

I whakaputaina tēnei pukaiti i te tau 2014
mō Te Tāhuhu o te Mātauranga e Hana Limited.

Mana pupuri © Te Tāhuhu o te Mātauranga, 2014.

Nama take: 710943

